

楚王趙匡凝北帝祥應

楚王趙匡凝鎮襄州也州郭舊有北帝堂歲久蕪毀在營壘中  
一旦楚王寢室之上有物如曳戟皮革之聲瓦皆震動潛起視  
之見黑氣一道自北帝舊基之所至板屋上楚王異之密加虔  
祝將欲興創堂宇以答祥應詰明視事之際先嘗選將校五十  
人俾往營田日給以衣裝農器指揮教命一無應者楚王疑有  
異圖拘而訊之得其構孽之狀咸勦戮焉王乃謂人曰北帝靈  
驗信有徵矣中夜有雲氣之異詰朝乃姦慝彰明若非立功告  
示幾有不測之禍遂締飾堂廡崇嚴像貌俾謁之士主其香燈  
闔境瞻禱累獲符應矣

道藏輯要

雲笈七籤  
十三

美

井集六  
X01

李昌遐誦消災經驗

李昌遐者後漢兗州刺史之後也生而奉道嘗誦太上靈寶昇  
立消災護命經而稟性柔弱每爲衆流之所侵虐忽因晝寢夢  
坐煙霞之境四顧而望熊羆虎豹圍繞周匝莫知所措不覺傷  
歎何警戒之甚邪謂積善之無驗於時空中有一道士呼其名  
而語之曰吾卽救苦真人也汝勿驚駭吾奉太上符命與諸神  
將密衛於汝且汝常念者經云流通讀誦則有飛天神王破邪  
金剛護法靈童救苦真人金精猛獸各百億萬衆俱侍衛是經  
昌遐旣覺豁然大悟因知自前侵虐我者未有無禍患殃咎蓋  
誦經之所驗也